

金史

冊五

金

史

卷一百一十五

金史卷二十三

元中書右丞相總裁脫脫等修

志第四

五行

五行之精氣在天爲五緯在地爲五材在人爲五常及五事五緯志諸天文歷代皆然其形質在地性情在人休咎各以其類爲感應於兩間者歷代又有五行志焉兩漢以來儒者若夏侯勝之徒專以洪範五行爲學作史者多采其說凡言某徵之休咎則以某事之得失繫之而配之以五行謂其盡然其弊不免於傳會謂其不然肅時雨若蒙恆風若之類箕子蓋嘗言之金世未能一天下天文災祥猶有星彗之說五行休咎見於國內者不得他諉乃彙其史氏所書仍前史法作五行志至於五常五事之感應則不必泥漢儒爲例云

初金之興平定諸部屢有禎異故世祖每與敵戰嘗以夢寐卜其勝負烏春兵至蘇速海甸世祖曰予夙昔有異夢不可親戰若左軍有力戰者當克旣而與

肅宗等擊之敵大敗太祖之生也常有五色雲氣若二千斛困廩之狀屢見東方遼司天孔致和曰其下當生異人建非常之事天以象告非人力所能爲也溫都部跋忒畔穆宗遣太祖討之入辭奏曰昨日見赤祥往必克遂與跋忒戰殺之穆宗攻阿疎日辰巳間忽暴雨昏暄雷電環阿疎所居是夕有巨火聲如雷墜阿疎城中遂攻下之太祖嘗往寧江夢幹帶之禾場焚頃刻而盡覺而太戚卽馳還幹帶已寢疾翌日不起幹帶伐高麗太祖臥而得夢亟起曰今日捷音必至乃爲具於毬場以待有二驪渡水而至獲之太祖曰此休徵也言未旣捷書至衆大異之他日軍寧江駐高阜撒改仰見太祖體如喬松所乘馬如岡阜之大太祖亦視撒改人馬異常撒改因白所見太祖喜曰此吉兆也卽舉酒酹之曰異日成功當識此地師次唐括帶幹甲之地諸軍介而立有光起於人足及戈矛上明日至札只水光復如初

收國元年在寧江州有光正圓自空而墜八月己卯黃龍見空中丁未上候遼軍還至熟結灤有光復見於矛端天輔六年三月師攻西京有火如斗墜其

城中是月城降而復叛四月辛卯取之

太宗天會二年曷懶移鹿古水霖雨害稼且爲蝗所食秋泰州潦害稼 三年

七月錦州野蠶成蠶九月廣寧府進嘉禾 四年十月中京進嘉禾 六年冬

移懶路饑 九年七月丙申上御西樓聽政聞咸州所貢白鵲音忽異常上起

視之見東樓外光明中有像巍然高五丈許下有紅雲承之若世所謂佛者乃

擎跏修虔久之而沒 十年冬移懶曷懶等路饑

熙宗天會十三年五月甘露降於廬州熊岳縣 十五年七月辛巳有司進四

足雀丙戌夜京師地震

天眷元年夏有龍見於熙州野水凡三日初於水面見一蒼龍良久而沒次日

見金龍一爪承一嬰兒兒爲龍所戲略無懼色三日如故又見一人乘白馬紅

袍玉帶如少年官狀馬前有六蟾蜍凡三時乃沒郡人競往觀之七月丁酉按

出澣河溢壞民廬舍 三年十二月丁丑地震

皇統元年秋蝗十一月己酉稽古殿火 二年二月熙河路饑三月辛丑大雪

秋燕西東二京河東河北山東汴平州大熟 三年陝西旱五月丁巳京兆府貢瑞麥七月丙寅太原進獬豸及瑞麥 四年正月乙丑陝西進嘉禾十有二莖一本七穎十月甲辰地震 五年閏月戊寅大名府進牛生麟壬辰懷州進嘉禾 七年十一月完顏秉德進三角牛 九年四月壬申夜大風雨雷電震寢殿鴟尾壞有火入帝寢燒帷幔上懼徙別殿丁丑有龍鬪于利州榆林河上大風壞民居官舍十六七木瓦人畜皆飄揚十餘里死傷者數百同知州事石抹里壓死

海陵天德二年十二月野人採石炭獲異香

貞元二年五月癸丑南京大內災 三年十二月己丑雨木冰

正隆二年六月壬辰蝗飛入京師秋中都山東河東蝗 四年十一月庚寅霜附木 五年二月辛未河東陝西地震鎮戎德順等軍大風壞廬舍民多壓死

海陵問司天馬貴中等曰何爲地震貴中等曰伏陽逼陰所致又問震而大風何也對曰土失其性則地以震風爲號令人君嚴急則有烈風及物之災 六

年六月壬戌大風壞承天門鴟尾是歲世宗居貞懿皇后憂在遼陽一日方寢有紅光照其室及黃龍見於室上又夜有大星流入其邸八月復有雲氣自西來黃龍見其中人皆見之是時臨潢府聞空中有車馬聲仰視見風雲杳靄神鬼兵甲蔽天自北而南仍有語促行者未幾海陵下詔南征

世宗大定二年閏二月辛卯神龍殿十六位焚延及太和厚德殿 三年二月

丙申中都以南入路蝗 四年三月庚子夜京師地震七月辛丑大風雷雨拔

木臨潢府境禾黍穰生嵐州進白兔二八月永興進嘉禾異畝同穎中都南八路蝗飛入京畿十一月辛丑尙書省火是歲有年 五年六月戊子河南府進

芝草十三本得於芝田石上薦之太廟六月甲辰大安殿楹產芝其色如玉丙

午京師地震有聲自西北來殷殷如雷地生白毛七月戊申又震十一月癸酉

大霧晝晦 七年九月庚辰地震 八年五月甲子北望淀大風雨雹廣十里

長六十里六月河決李固渡水入曹州 十年正月鄧州進芝草 十一年六

月戊申西南路招討司苾里海水之地雨雹三十餘里小者如雞卵其一最大

廣三尺長丈餘四五日始消 十二年三月庚寅雨土四月旱 十三年正月

尙書省奏宛平張孝善有子曰合得大定十二年三月旦以疾死至暮復活云

是本良鄉人王建子喜兒而喜兒前三年已死建驗以家事能具道之此蓋假

屍還魂擬付王建爲子上曰若是則姦倖小人競生詐僞瀆亂人倫止付孝善

八月丁丑策試進士於憫忠寺夜半忽聞音樂聲起東塔上西達於宮考官完

顏蒲捏李晏等以爲文運始開得賢之兆 十四年八月丁巳朔次虬里舌日

午白龍見于御帳之東小港中旣而乘雷雲而上尾猶曳地良久北去 十六

年三月戊申雨豆於臨潢之境其形上銳而赤食之味頗苦五月戊申南京宮

殿火是歲中都河北山東陝西河東遼東等十路旱蝗 十七年七月大雨滹

沱盧溝水溢河決白溝 二十年四月己亥大寧宮門火五月丙寅京師地震

生黑白毛七月旱秋河決衛州 二十二年五月慶都蝗蝻生散漫十餘里一

夕大風蝗皆不見 二十三年正月辛巳廣樂園燈山焚延及熙春殿三月乙

酉氛埃雨土四月庚子亦如之五月丁亥雨雹地生白毛 二十四年正月辛

卯朔徐州進芝十有八莖真定進嘉禾二本異畝同穎 二十六年正月庚辰

河南府進芝三本秋河決壞衛州城 二十七年四月辛丑京師地震

章宗大定二十九年五月丁未地生白毛六月曹州河溢十二月密州進白鶉
白雉各一河間府進嘉禾是冬無雪明昌元年正月懷州河間等處進芝草嘉
禾二月地生白毛六月庚子都水進異卵夏旱七月淫雨傷稼 二年五月桓

撫等州旱秋山東河北旱饑 三年秋綏德虻蚘蟲生旱 四年三月御史中

丞董師中奏迺者太白晝見京師地震北方有赤氣遲明始散天之示象冀有
以警悟聖主也上問所言天象何從得之師中曰前監察御史陳元升得之於
一司天長行上曰司天臺官不奏固有罪其以語人尤非朕欲令自今司天有
事而不奏者長行得言之何如師中曰善五月霖雨命有司祈晴六月河決衛
州魏清滄皆被害是歲河北山東南京陝西諸路大稔邢洛深冀及河北西路
十六謀克之地野蠶成繭十一月壬午木冰 五年七月丙戌天壽節先陰雨
連日至是開霽有龍曳尾於殿前雲間是月河決陽武故堤灌封丘而東 六

年二月丁丑京師地震大雨雹晝晦大風震應天門右鴟尾壞 六年八月大雨雷電有龍起於渾儀鰲趺臺忽中裂而摧儀仆於臺下

承安元年五月自正月不雨至是月雨六月平晉縣民利通家蠶自成綿段長七尺一寸五分闊四尺九寸 二年自正月至四月不雨六月丙午雨雹 四年三月戊午雨雹五月旱 五年五月庚辰地震十月庚子天久陰是日雲色黃而風霾癸卯晨陰霜附木至日入亦如之 泰和二年八月丙申磁州武安縣鼓山石聖臺有大鳥十集於臺上其羽五色爛然文多赤黃赭冠鷄項尾闊而修狀若鯉魚尾而長高可逾人九子差小侍傍亦高四五尺禽鳥萬數形色各異或飛或蹲或步或立皆成行列首皆正向如朝拱然初自東南來勢如連雲聲如殷雷林木震動牧者驚惶卽驅牛擊物以驚之殊不爲動俄有大鳥如鵬鶚者怒來搏擊之民益恐奔告縣官皆以爲鳳凰也命工圖上之留二日西北去按視其處糞迹數頃其色冬異遺禽數千累日不能去所食皆巨鯉大者丈餘魚骨蔽地章宗以其事告宗廟詔中外 三年四月旱十月己亥大風

四年正月壬申陰霧木冰三月丁卯大風毀宣揚門鴟尾四月旱壬戌萬寧宮
端門災十一月丁卯陰木冰凡三日 五年夏旱 八年四月甲午雨雹河南
路蝗六月戊子飛蝗入京畿八月乙酉有虎至陽春門外駕出射獲之時又有
童謠云易水流汴水流百年易過又休休兩家都好住前後總成留至貞祐中
舉國遷汴

衛紹王大安元年徐沛界黃河清五百餘里幾二年以其事詔中外臨洮人楊
珪上書曰河性本濁而今反清是水失其性也正猶天動地靜使當動者靜當
靜者動則如之何其爲災異明矣且傳曰黃河清聖人生假使聖人生恐不在
今日又曰黃河清諸侯爲天子正當戒懼以銷災變而復誇示四方臣所未喻
宰相以爲妖言議誅之慮絕言路卽詔大興府鎖還本管十一月丙申平陽地
震有聲自西北來戊戌夜又震自此時復震動浮山縣尤劇城廨民居圯者十
七八死者凡二三千人 二年二月乙酉地大震有聲殷殷然六月七月至九
月晦其震不一十一月京師民周修武宅前渠內火出高二尺焚其板橋又旬

日大悲閣幡竿下石隙中火出高二三尺人近之卽滅凡十餘日自是都城連夜燔爇二三十處是歲四月山東河北大旱至六月雨復不止民間斗米至千餘錢 三年二月乙亥夜大風從西北來發屋折木吹清夷門關折二月戊午大悲閣災延燒萬餘家火五日不絕山東河北河東諸路大旱是歲有男子郝贊詣省言上卽位之後天變屢見火焚萬家風折門關非小異也宜退位讓有德有司問爾狂疾乎贊大言曰我不狂疾但爲社稷計宰相皆非其言每日省前大呼凡半月上怒誅之隱處崇慶元年七月辛未未時有風從東來吹帛一段高數十丈宛轉如龍墜於拱辰門內是歲河東陝西山東南京諸路旱 二年二月放進士榜有狂僧公言殺天子求之不知所在是歲河東陝西大旱京北斗米至八千錢

至寧元年宣宗彰德故園竹開白花如鷺鷥藤紫雲覆城上數日俄而入繼大統七月以河東陝西諸路旱遣工部尙書高朵剌祈雨于嶽瀆至是雨足時斗米有至錢萬二千者八月癸巳衛紹王遇弒是日海水不潮寶坻鹽司懼其虧

課致禱無應九月丙午宣宗卽位乃潮初衛王卽位改元大安四年改曰崇慶
旣而又改曰至寧有人謂曰三元大崇至矣俄而有胡沙虎之變

宣宗貞祐元年八月戊子夜將曙大霧蒼黑跂步無所見至辰巳間始散十二
月乙卯雨木冰時衛州有童謠曰團團冬劈半年寒食節沒人煙明年正月元
兵破衛遂丘墟矣 二年六月潮白河溢漂古北口鐵裏關門至老王谷庚申
南京寶鎮閣災壬戌上次宜村有黃龍見於西北冬黃河自陝州界至衛州入
柳樹清十餘日纖鱗皆見十二月己酉雨木冰 三年二月戊午大風隆德殿
鴟尾壞三月戊辰大風霾四月自去冬不雨至於是月五月河南大蝗六月京
城中夜妄相驚逐狼月餘方息十月丙申昏西北有霧氣如積土至二更乃散
四年正月己未旦黑霧四塞巳時乃散是春河朔人相食五月河南陝西大
蝗鳳翔扶風岐山郿縣蟲蟲傷麥七月旱癸丑飛蝗過京師

興定元年三月宮中有蝗四月單州雹傷稼陳州商水縣進瑞麥一莖四穗開
封府進瑞麥一莖三穗二莖四穗五月乙丑河南大風吹府門署以去延州原

武縣雹傷稼七月癸卯大社壇產嘉禾一莖十五穗秋霖雨十月邠州進白兔
丹州進嘉禾異畝同穎 二年四月河南諸郡蝗五月秦陝狼害人六月旱是
歲京師屢火遣禮部尙書楊雲翼禱之 三年春吏部火四月癸未陝右黑風
晝起有聲如雷頃之地大震平涼鎮戎德順尤甚廬舍傾壓死者以萬計雜畜
倍之夏旱十二月壬申雨木冰 四年正月戊辰二更天鳴有聲壬子晝晦有
頃大雷風雨四月丁丑大風吹河南府署飛百餘步戶案門鑰開文牘飄散不
知所在六月旱七月河南大水唐鄧尤甚十二月癸酉火是歲華州渭南縣民
裴德寧家伐樹破其中有赤色太字表裏脗合有司言與唐大歷中成都瑞木
有文天下太平者其事頗同蓋太平之兆也乞付史館 五年三月以久旱詔
中外仍命有司祈禱十一月壬寅京師相國寺火十二月丁丑霜附木先是有
童謠云青山轉轉山青耽誤盡少年人蓋言是時人皆爲兵轉鬪山谷戰伐不
休當至老也

元光元年四月京畿旱十月上獵近郊獲白兔羣臣以爲瑞明日御便殿置鈴

於項將縱之兔驚躍不已忽斃几上 二年正月辛酉日午有鶴千餘翔于殿庭移刻乃去七月乙卯丹鳳門壞壓死者數人十一月開封有虎害人是時屢有妖怪二年之中白日虎入鄭門吏部及宮中有狐狼鬼夜啼于輦路烏鵲夜驚飛鳴蔽天十二月宣宗崩

哀宗正大元年正月戊午上初視朝尊太后爲仁聖宮皇太后太元妃爲慈聖宮皇太后是日大風飄端門瓦昏霾不見日黃氣塞天仁聖又夢乞丐萬數踵其後心惡之占者曰后爲天下母百姓貧窶將誰訴焉遂勅京城設粥與冰藥以應之人以爲壬辰癸巳之兆又有人衣麻衣望承天門大笑者三大哭者三有司拘而問之其人曰我先笑者笑許大天下將相無人後哭者哀祖宗國家破蕩至此也有司以爲妖言處之重典上曰近詔草澤之士並許直言雖涉譏訕亦不治罪況此人言亦有理止不應笑哭闕下耳乃杖之 二年正月甲申有黃黑之祲四月旱京畿大雨雹 三年春大寒三月乙丑有火自吏部中出大如斛流行展轉人皆驚避踰時而滅四月旱蝗六月京東雨雹蝗死 四年

六月丙辰地震八月癸亥大風吹左掖門鴟尾墜丹鳳門扉壞是日風霜損禾皆盡 五年春大寒二月雷而雪木之華者皆敗四月鄭州大雨雹桑柘皆枯京畿旱八月御座上聞若有言者曰不放捨則何索之不見 七年十二月新衛州北三里許有影在沙上如舊衛州城狀寺塔宛然數日乃滅

天興元年正月丁酉大雪二月癸丑又雪戊午又雪是時鈞州陽邑盧氏兵皆大敗五月大寒如冬七月庚辰兵刃有火閏八月己未有箭射入宮中九月辛丑夜大雷工部尙書蒲乃速震死 二年六月上遷蔡自發歸德連日暴雨平地水數尺軍士漂沒及蔡始晴復大旱數月識者以爲不祥初南京未破一二年間市中有一僧不知所從來持一布囊貯棗日散與市人無窮所在兒童百十從之又有一人拾街中破瓦復以石擊碎之人皆以爲狂不曉其理後乃知之其意蓋欲使人早散國家將瓦解矣

金史卷二十三考證

五行志邢洛深冀及河北西路○臣召南按洛字當作洛地與邢冀相連非河

南洛陽也洛洛字形相似而誤耳

有龍起於渾儀鰲趺○趺音扶舊本訛跌

金史卷二十三考證